

# PORODIČNI ŽIVOT I ISTOSPOLNE ŽIVOTNE ZAJEDNICE



## PRAVNI OKVIR

Međusobni odnosi istospolnih partnera i njihove životne zajednice nisu normirane niti u jednoj administrativnoj jedinici u BiH (FBiH, RS, Distrikt Brčko). Na ovaj način LGBTI osobama onemogućeno je da koriste ustavima zagarantovana prava koja se odnose na ličnu slobodu i sigurnost, na privatni i porodični život, odnosno dom, na zasnivanje porodice, zaštitu stečene imovine ili na slobodu kretanja i prebivališta.

Obaveza BiH da reguliše istospolne zajednice proizlazi iz njenog članstva u Vijeću Evrope, ali i presuda Evropskog suda za ljudska prava.



## INSTITUCIONALNO DJELOVANJE

Vlada FBiH je u oktobru 2018. godine usvojila informaciju Federalnog MUP-a u kojoj se govori o zahtjevima za upis podataka u matične evidencije koje se odnose na životne zajednice istospolnih parova. Vlada je usvojila prijedlog Federalnog MUP-a za imenovanje interresorne radne grupe koja će analizirati postojeće propise i predložiti nove koje je potrebno donijeti kako bi istospolni parovi iz životne zajednice ostvarivali prava koja proizilaze iz Evropske konvencije za zaštitu ljudskih prava i sloboda, a koja postoje za heteroseksualne parove u BiH.

Ovo predstavlja najznačajniji iskorak na ovom polju koji se desio u Bosni i Hercegovini. Radna grupa je započela sa radom i imala konstituirajuću sjednicu 6. februara 2020. Predstavnici Sarajevskog otvorenog centra su također pozvani da učestvuju u radu grupe.

## SOC ISTRAŽIVANJE NA OVU TEMU


Da je neregulisanje istospolnih zajednica jedan od najproblematičnijih aspekata, pokazalo je i SOC-ovo istraživanje iz 2017. među LGBTI osobama na ovu temu, gdje su dvije trećine ispitanika\_ca navele nemogućnost zaključivanja životnih zajednica kao jako važan problem.

Nadalje, činjenica da u navedenom istraživanju preko dvije trećine ispitanika\_ca živi ili planira živjeti s partnerom\_icom, kao i da bi natpolovična većina njih zaključila istospolno partnerstvo da im je omogućeno, daje dovoljno jasnu sliku o diskrepanciji između potreba LGBTI osoba na jednoj i dosadašnjeg ignorisanja ovog pitanja od države na drugoj strani.

DA LI BISTE ZAKLJUČILI ŽIVOTNO PARTNERSTVO  
ILI ŽIVOTNU ZA-JEDNICU UKOLIKO BI TO BILO  
MOGUĆE URADITI U BIH?


Nisam siguran\_a

30.1%



Da  
53.8%

Ne  
16.1%



## DOKUMENTOVANI SLUČAJEVI

Tokom 2019. godine, SOC-u su se javila 4 para s upitima vezanim za istospolna partnerstva/brak. Predmet interesa su i dalje pitanja postojanja prava i obaveza u BiH osoba koje su sklopile brak/partnerstvo u drugoj zemlji te mogućnosti sklapanja istospolnog partnerstva u BiH.

Trenutno su na sudovima u BiH aktivna dva slučaja LGBTI osoba koja traže prava koja direktno proizilaze iz pitanja istospolnih životnih zajednica i porodičnog života.